

# ԻՆՉՊԻՍԻ ԱԶԳ ԵՆՔ

Posted on September 15, 2012 by Keghart



Category: [Opinions](#)



## Յարուբ Տեր Դաւիթեան, Լոս Անճելըս, 15 Սեպտեմբեր 2012

Ազգերու պատմութեան մէջ կը պատահին դէպքեր, որոնք անկիւնադարձային  
 նշանակութիւն կ'ունենան, յեղաշրջելով տուեալ ազգի մարդկանց մտայնութիւններն ու կեանքերը: Արցախեան շարժումն ու Հայաստանի անկախացումը այդպիսի ճակատագրական տարողութիւն ունեցող դէպքեր են, որոնց ականատեսներն ու մասնակիցներն ենք ազգովին: Չենք խորհիր, որ անցնող ամէլի քան երկու տասնամեակներու ընթացքին, աշխարհի վրայ կար հայ մը, որու մտածելակերպը չազդուեցաւ այս երկու նուաճումներէն, սկզբնական շրջանի խանդավառութիւնէն մինչեւ ներկայի մտահոգիչ վիճակը: Ու մեր այսօրուան մտահոգիչ վիճակն է, որ մեզ կը մղէ լուծումներու որոնման եւ առաջին հերթին հարց տալու թէ ի՞նչպիսի ազգ ենք:

## Յարուբ Տեր Դաւիթեան, Լոս Անճելըս, 15 Սեպտեմբեր 2012

Ազգերու պատմութեան մէջ կը պատահին դէպքեր, որոնք անկիւնադարձային  
 նշանակութիւն կ'ունենան, յեղաշրջելով տուեալ ազգի մարդկանց մտայնութիւններն ու կեանքերը: Արցախեան շարժումն ու Հայաստանի անկախացումը այդպիսի ճակատագրական տարողութիւն ունեցող դէպքեր են, որոնց ականատեսներն ու մասնակիցներն ենք ազգովին: Չենք խորհիր, որ անցնող ամէլի քան երկու տասնամեակներու ընթացքին, աշխարհի վրայ կար հայ մը, որու մտածելակերպը չազդուեցաւ այս երկու նուաճումներէն, սկզբնական շրջանի խանդավառութիւնէն մինչեւ ներկայի մտահոգիչ վիճակը: Ու մեր այսօրուան մտահոգիչ վիճակն է, որ մեզ կը մղէ լուծումներու որոնման եւ առաջին հերթին հարց տալու թէ ի՞նչպիսի ազգ ենք:

Պիտի կարենա՞նք ամրապնդել մեր այս նուաճումները, թէ անգամ մը եւս ձեռքէ պիտի տանք զանոնք: Այն ինչի որ ականատես կ'ըլլանք երկու տասնամեակներէ ի վեր, դժբախտաբար մեզ չի յուսադրեր, որ ճիշտ ուղիի վրայ ենք: Ինչո՞ւ: Որովհետեւ մեր համոզումով, ազգ մը իր ապագան կը կերտէ իր իտեալներու պատկերով: Եւ նկատելով, որ ազգ եւ պետութիւն կերտելու եւ զարգացնելու իտեալները, դժբախտաբար մեր ժողովուրդի մտածելակերպին մէջ առաջնահերթութիւն չեն, հետեւաբար իրաւունք ունինք մտահոգուելու: Բացատրենք մի քանի օրինակներով, թէ ի՞նչ են մեր մտահոգութեանց տուն տուող գլխաւոր պատճառները:

### Ընտանիք եւ Ազգ

1934ին Շահան Շահնուր կը հրատարակէր «Ազատն Կոմիտաս» յօդուածը, ուր կ'ըսէր. «Եթէ աչքի առջեւ ունենանք սա յառաջատուութիւնը- անհատ, ընտանիք, ազգ,

մարդկութիւն- կը տեսնենք որ Հայը կեցած է երկրորդ հանգրուանին: Այսօր կան տարանջատ ընտանիքներ, բայց դեռ չկայ Ազգն Հայոց»: Որքան այժմեական կը հնչէ այս միտքը, հակառակ մօտ 80 տարիներու հեռաւորութեան: Եթէ 1920-1930-ական թուականներուն դժուար էր ակնկալել, որ իրենց օրապահիկի եւ գոյատեւութեան պայքարով կլանուած Եղեռնէն վերապրած ու տեղահանուած սերունդները, հասկնային Շահնուրի ախտաճանաչման տարողութիւնը. եթէ նոյն տարիներուն, փորձենք հասկնալ եկեղեցիներու, կուսակցութիւններու եւ այլ կազմակերպութիւններու իրենց ազդեցութեան գօտին ժողովուրդին վրայ տարածելու մարմաջին հետամուտ գործունեութիւնը. ապա ինչպէ՞ս արդարացնել անցնող տասնամեակներու եւ մանաւանդ Հայաստանի անկախացումէն ի վեր, բացայայտ պակասը Ազգն Հայոց գաղափարի, ազգային շահի եւ ազգասիրական գիտակցութեան: Այդ տարիներու տիտղոս պատկերները բան մը չի փոխեցի՞ն մեր մտածելակերպին մէջ, որ կը շարունակենք ընթանալ նոյն ճանապարհով: Հասնելու համար ու՞ր: Նոյն պառակտուած վիճակի՞ն:

Շահնուր իրաւացի է նոյնիսկ այսօր, ի տես սակաւաթիւ օլիկարխ-ընտանիքներու աւատապետական, ազգասիրական գիտակցութիւնէ զուրկ, ազգաքանդ գործունեութեան: Շահնուր իրաւացի է նոյնիսկ այսօր, ի տես հայրենի երկրի հարստութիւնները կեղեքող ընչաքաղձ, վաշխառու ղեկավարներու: Շահնուր իրաւացի է նոյնիսկ այսօր, ի տես հայաթափման գնով իսկ իրենց անձնական-իշխանական շահերուն հետամուտ իշխանաւորներու: Շահնուր իրաւացի է նոյնիսկ այսօր, ի տես ազգային-պետական թանգարաններէ ու հաստատութիւններէ անհետացող ազգային գանձերու, որոնք վստահաբար կ'երթան անհատներու տուները զարդարելու: Շահնուր իրաւացի է նոյնիսկ այսօր, ի տես համատարած խարդախութիւններով իրենց լուծը ժողովուրդին վրայ պարտադրող բռնապետներու, ի հեճուկս ժողովուրդի զարգացման:

## Անձնական Օրինակով Առաջնորդութիւն

Շատ բնական է, որ մարդ արարածը, մանաւանդ կանուխ տարիքին, իր ինքնութիւնը կը կազմաւորէ ու կը հետեւի այն մարդոց, զորոնք կ'ընտրէ որպէս օրինակելի տիպարներ իր կեանքին: Անոնց վարուելակերպը բնագործէն կ'ամրապնդուի իր ենթագիտակցութեան մէջ: Ու սակաւաթիւ են անոնք, որոնց կը յաջողուի գիտակցական տարիքի մէջ ճեղքել եւ դուրս գալ իրենց բնական թուացող այդ ինքնութեան սահմաններէն, մշակելով իրենց ինքնուրոյն անհատականութիւնները: Ասկէ մեկնած, երբ կը նայինք մեր շուրջը եւ կը տեսնենք մեր ինքնութեան խարխիս հանդիսացող հայրենի հողի ու հայրենի պետութեան ղեկավարներու վարուելակերպը, ինչպէ՞ս կրնանք ջուսախաբուիլ ու չմտահոգուիլ ի տես անոնց այսպանելի ընթացքին:

Այսօր դժբախտաբար, գեթ մեր սերունդի մարդոց համար, որոնք սփիւռքեան ասփերուն դաստիարակուեցան իտեալական հայրենիքի մտապատկերով ու խորենացիի աւանդած հայ ազգային արժանիքներու եւ նկարագրային գծերու յատկանիշերով, ահաւոր փլուզում մը կ'ապրինք մեր հոգիներուն մէջ, ի տես վատնուող այն առիթներուն, որոնց իրագործումով կրնայինք իրականացնել մեր շատ մը իտեալներն ու անկատար տենչերը: Ինչպէս ջուսախաբուիլ ի տես Արցախի գաւակ դեկավարներու, առաջնորդութեամբ Ռ. Քոչարեան-Ս. Սարգսեան զոյգին, չարաշահումներուն եւ անհաշիւ հարստացման, ի հեճուկս նոյնիքն Արցախի տկարացման: Անոնց հարստահարած բազմահարիւր միլիոններով կարելի չէ՞ր գեթ մասամբ վերաբնակեցնել Արցախը եւ ամրապնդել մեր դիրքը: Ինչպէս ջուսախաբուիլ ի տես 1988ի ահաւոր երկրաշարժէն գրեթէ 24 տարիներ ետք, մօտ 6000 ընտանիքներու ժամանակաւոր տնակներու մէջ տուայտման, երբ նոյն շրջանի քաղաքապետը տիրացած է անհաշիւ հարստութեանց եւ իր սանձարձակութիւններով քաղաքէն եւ երկրէն դուրս կը վանէ քաղաքացիները: Դժբախտաբար կարելի է այս շարքը շատ երկարել, նշելով շատ մը օլիկարխներու անմարդկային արարքները, հասնելով մինչեւ Հարսնաքար եւ Ռուբէն Հայրապետեան: Ինչպիսի ապագայ կարելի է սպասել Հայաստանի վերնախաւին տիրացած այսպիսիներու առաջնորդութիւնէն: Մտահոգիչ չէ՞:

## Բարձրացիւր Բարձրացուր

Ահաւասիկ չարչրկուած նշանաբան մը եւս, զոր յաճախակիօրէն կը կրկնենք եւ ոչ միայն չենք գործադրեր, այլ հակառակին ալ ատակ ենք: Մեր մէջ նախանձն ու անվստահութիւնը այնքան արմատացած է, որ պաշտօնի հասնելու համար կ'ոտնակոխենք ամէն իտեալ ու հասնելէ ետք ալ կ'ոտնակոխենք մեր ստորադասները, զանոնք նկատելով որպէս սպառնալիք մեր դիրքին: Այնքան կլանուած ենք մեր անձնական ու հատուածական շահերով, որ արգելք կը հանդիսանանք մեր եւ մեր շրջապատի զարգացման ու հետեւաբար մեր ազգային յառաջընթացին: Հայաստանի օլիկարխներն ու իրենց մենաշնորհները դասական մէկ օրինակը չէ՞ն այս ախտին: Իր օրով, խորենացին իսկ հալածուեցաւ շրջապատի վերնախաւէն, ու թերեւս Պատմահայր չդառնար, եթէ Սահակ Բագրատունի մը առիթը ընծայած չըլլար իրեն, կերտելու Հայոց Պատմութիւնը, որ որպէս դասագիրք, 1400 տարիներու վրայ սերունդներ դաստիարակեց հայկական ինքնութեամբ:

Արդեօք քանի՛ քանի՛ շնորհալի տաղանդներու երկունքը վիժեցաւ ու տակաւին կը վիժի այս մտայնութեան պատճառաւ: Ո՞րք են այսօրուան Սահակ Բագրատունիները: Դժբախտաբար մենք այնքա՞ն կլանուած ենք մեր անձնական շահերով, որ մտահան կ'ընենք թէ երբ կ'առաջնորդուինք «ճանաչել զիմաստութիւն եւ խրատ, իմանալ զբանս հանճարոյ» նշանաբանով, մենք կը յառաջդիմենք: Բայց երբ «ուր հաց, հոն կաց» նշանաբանը կ'որդեգրենք որպէս վարգագիծ, պարզապէս գոյութիւն մը քարշ կու տանք,

մսխելով անցեալէն ժառանգուած դրամագլուխը: Ինչո՞ւ կը դժուարանանք գիտակցիլ այս իրականութեան եւ միշտ անմիջական եւ դիւրին պատառի տեսքը մեզ ետ կը վանէ ու կը զրկէ ճաշ պատրաստելու եւ զայն ըմբռնելու գոհունակութիւնէն: Ինչո՞ւ մէկ օրուան համար քանի մը հազար դրամ կաշառքի խայծը, կը մթագնէ մեր դատողութիւնը, ու մենք կ'ընտրենք առաջնորդներ, որոնք մեզ կը կեղեքեն իրենց պաշտօնավարութեան հինգ տարիներու ընթացքին: Մտահոգուելու իրաւունք չունի՞նք:

Ո՞ր օրուան կը սպասենք գիտակցելու, որ ազգովին վայրէջքի մէջ ենք եւ այս ընթացքով հակամետ ենք ենթարկուելու նոր աղէտներու: Ինչպիսի ազգ ենք, որ հակառակ հազարաւոր տարիներու մեր պատմութեան, կը թերանանք դասեր քաղել հոնկէ, յօգուտ մեր ազգի յառաջդիմութեան: Ինչո՞ւ համար երբ դժուարութեանց եւ մարտահրաւերներու դէմ հանդիման կու գանք, կը նախընտրենք հետեւիլ Ուիլեմ Սարոյեանի խօսքերուն եւ աշխարհի տարածքին փոքրիկ փոքրիկ Հայաստաններ կերտել, որոնք վստահաբար պիտի չքանան քանի մը սերունդներ ետք, փոխանակ անսալու Չարենցեան պատգամին՝ «Ո՛վ հայ ժողովուրդ, քո միակ ՓՐԿՈՒԹԻՒՆԸ քո ՀԱԲԱՔԱԿԱՆ ուժի մէջ է»: Ինչպիսի ազգ ենք:

